

Fröhliche Weihnachten

Om letzde Sunndaach war unsern alde Kumpel Hubert widder mol bei uns om Stommdisch. Der kimmt joo sunnst immer on Weihnachte nooch Flerschem, awwer dissmol warer e Woch frieher hier, weiler on de Feierdaache was vor hätt.

Ei was hosden dann vor?, hotten de Schorsch gefroocht.

Die Berta und ich fahren an Heiligabend in die Rhön, hott de Hubert gesacht, und bleiben dort bis Silvester, einfach mal ein paar Tage die Tapeten wechseln.

De Schorsch hott soi Schnut verzoosche, irchend ebbes hottem on dere Antwort nit gebasst unn deshalb hotter gleich e onner Frooch gestellt. Heert emol her, ihr drei, saacht emol, was halten ihr noch von Weihnachte?

Mir drei hawwe uns oogeguckt, unn ich habb gesacht: Dess iss e bleed Frooch: Was halten ihr noch von Weihnachte!

De Schorsch iss gleich in die Luft gonge. Was sollen doo droo bleed soi – saach merr dess emol. Doo frächt merr was unn schunn kriecht merr iwwers Maul gefahrn. Macht doch weider mett eiem schleechd Geschwätz, ich saach gar nix mehr.

No, no, wollt de Karl de Schorsch e bissi beruhiche, jetz losse mol die Kerch im Dorf. De Honnes hott gesacht, dess wär e bleed Frooch unn dess war nit gut. Awwer aach ich wollt dich froosche, wasde doodemett gemoont host, was mir noch von Weihnachte halde dete.

De Schorsch hot nor de Karl oogeguckt. Dir sach ichs. Der oone fährt in die Rhön, moi Enkel giehn uff die Disco, unn iwwerall in de Zeidunge konnsde nix onnerst mehr lese als dass die Geschäfte länger uffmache unn dasses Weihnachtsgeschäft besser wern misst weeche de Konjunkdur. Dass merr in de Familie sich alsesomme widder mol sieht, e bissi Zeit ferr sich hott, aach emol in die Kerch gieht odder unnerm Christbaum bet unn singt, dess heersde nor noch vom Parre unn soine Messdiener. Unn deshalb wollt ich wisse, was ihr noch von Weihnachte halde dut. Awwer dess iss joo e bleed Frooch.

De Hubert hott mettem Kopp gewackelt unn hott gesacht: Schorsch, dir war doch schon nicht recht, dass ich gesagt habe, wir würden einige Tage wegfahren.

De Schorsch druff: Misst ihr dann fortfahrn, kennt ihr nit emol dehoom bleiwe wenn e paar Feierdaach om Himmel sinn? Alsfort sinnse unnerweechs, die Leit, dess isses was ich moon, entweder in de Rhön odder im Einkaufszentrum, die Weihnachtsdaache sinn nor noch gut ferr oizekaafe odder e paar Daach fortzefahrn. Awwer jetz heer ich uff mett moim bleede Zeich.

Aach de Hubert wollt de Schorsch jetz beruhiche. Aber Schorsch, das ist doch kein Grund, so kurz vor Weihnachten hier am Stammtisch Streit zu beginnen. Nur weil der Hannes so etwas gesagt hat.

De Schorsch war gonz wild. Wenn ich Krach mache will dann mach ich Krach, doo kann mich kooner droo hinnern, verdammt noch emol. Ei losst merr doch moi Ruh.

Dann isser ohne Gude ze saache uffgestonne unn iss on die Thek zum Bezahle.

De Hubert war gonz dorchonner. Was ist das denn? Der lässt uns glatt alleine am Stammtisch sitzen. Unn hott dem Schorsch noochgerufel: Fröhliche Weihnachten, du eingeschnappter Dollbohrer!

Unn de Karl hottem noochgerufe: Und Friede auf Erden, du Knallkopp!

Eiern Honnes